



(12 November 2020) Sinar, P. 12

'Tiada isu takut mati'

Dr Noor Hisham jawab tuduhan ahli Parlimen persoal beliau tidak turun padang ke Sabah

PUTRAJAYA

Ketua Pengarah Kesihatan, Tan Sri Dr Noor Hisham Abdullah berkata, tidak timbul isu takut mati dalam melaksanakan tugasnya untuk memutuskan rantaian jangkitan Covid-19 di negara ini.

Mengulas dakwaan seorang ahli Parlimen yang mempersoalkan beliau tidak turun padang ke Sabah, Dr Noor Hisham berkata, Kementerian Kesihatan Malaysia (KKM) sudah membuat perancangan khusus untuk Sabah dan beliau sendiri pergi ke negeri itu pada akhir Ogos lalu untuk

melihat pengurusan dan kesiapsiagaan KKM terutamanya bagi Pilihan Raya Negeri Sabah.

"Saya juga telah arahkan timbalan saya, Datuk Dr Chong Chee Kheong untuk turun bersama minggu lepas. Tan Sri Jemilah Mahmood (Penasihat. Khas Perdana Menteri mengenai Kesihatan Awam) juga turun dua minggu lepas untuk melihat pengurusan dan isu-isu di Sabah.

"Tidak timbul isu kita takut mati. Kita sebagai orang Islam, kita terima kematian itu boleh berlaku di mana-mana, bukan hanya turun padang ataupun tidak," katanya pada sidang akhbar harian perkembangan Covid-19 di sini semalam.

Mengulas lanjut, Dr Noor Hisham berkata, apa yang penting ialah niat untuk melaksanakan tugas dan



DR NOOR HISHAM

memutuskan rantaian Covid-19 dalam negara.

"Kita boleh selisih pendapat, tetapi apa yang kita laksanakan ialah memutuskan jangkitan Covid-19 dalam negara supaya dapat menyelamatkan negara kita," katanya.

Persidangan Dewan Rakyat semalam kecoh susulan kenyataan 'DG (Ketua Pengarah Kesihatan) takut mati' dikeluarkan Datuk Seri Tiong King Sing (GPS-Bintulu) pada sesi perbahasan Rang Undang-undang Perbekalan 2021.

King Sing ketika membahaskan rang undang-undang itu mempersoalkan Dr Noor Hisham yang tidak turun padang untuk melihat sendiri situasi Covid-19 di lapangan, sebaliknya hanya membuat sidang media setiap hari melalui siaran langsung televisyen. - Bernama

822 kes baharu, dua kematian

KUALA LUMPUR - Malaysia merekodkan 822 kes baharu Covid-19 dan dua kematian dalam tempoh 24 jam lalu, sekali gus mencatatkan jumlah kumulatif sebanyak 42,872 kes.

Ketua Pengarah Kesihatan, Tan Sri Dr Noor Hisham Abdullah berkata, dalam tempoh itu, sebanyak 769 kes pulih turut direkodkan menjadikan jumlah kumulatif kes pulih sepenuhnya sebanyak 31,073 kes atau 72.5 peratus daripada jumlah keseluruhan kes.

Mengenai pecahan kes tempatan semalam, katanya, Sabah terus mencatatkan jumlah tertinggi dengan 258 kes diikuti Negeri Sembilan (225), Selangor (176), Labuan (46), Pulau Pinang (26), Kuala Lumpur (17), Kedah (17) dan masing-masing 14 kes di Sarawak dan Perak.

Selain itu, Johor mencatatkan 10, Melaka (6), Putrajaya (3), Perlis (2) dan satu kes di Kelantan.

Dr Noor Hisham berkata, daripada jumlah kes baharu itu, tujuh merupakan kes import melibatkan seorang warganegara dan enam bukan warganegara yang masing-masing pulang dari India, Kanada, Indonesia, Arab Saudi, Afganistan, Emiriah Arab Bersatu (UAE) dan Rusia.

Mengulas lanjut, beliau berkata, pertambahan dua kematian direkodkan di Sabah melibatkan wanita bukan warganegara. - Bernama

SITUASI TERKINI KES COVID-19 DI MALAYSIA SETAKAT SEMALAM

